

DISTRIKAN'ANKAZOBE

Mbola miisa 8 ireo olon-tsotra tazonin'ny dahalo an-keriny

Mbola miisa 8 ireo olon-tsotra tazonin'ny dahalo an-keriny, any amin'ny distrikan'Ankazobe faritra Analamanga hatramin'ny alahady teo. Ho fikatsaham-bahaolana amin'izany resaka kidnapping izany, nidina fotony tany an-toerana ny komandrin'ny Zandarimariam-pirenena ny jeneraly Andry Rakotondrazaka ny faran'ny herinandro teo. Nahazo vahana tokoa ny resaka tsy fandriampahalemana ao amin'ny distrikan'Ankazobe tato anatin'ny herinandro maromaro izay. Niverina nampitondra faisana ireo mponina ao amin'ireo kaominina ambanivohitra ao amin'ity distrika ity ny resaka fakana an-keriny. Ao anatin'ny fikarohana tanteraka ireo mpitandro filaminana amin'izao fotoana izao, ary andro aman'alina ny hetsika ataon'izy ireo ao anatin'ny distrikan'Ankazobe sy ny



Ny tanànan'i Mahavelona, anisan'ny mitondra faisana amin'ny resaka fakana olona an-keriny.

manodidina. Misy ny hetsika fampandrian-tany maharitra any antoerana ankehitriny entina iarovana ireo vahoaka. Niara-dia taminy nandritra izany ny Jeneraly komandin'ny ZDS Ikopa avy amin'ny tafika Malagasy, ny Komandin'ny fari-piadian'ny Zandarimaria Antananarivo ary ireo mpiaramiasa aminy akaiky. Teo ny fametrahana pai-

kady miaraka amin'ireo Zandary sy Tafika, izay mifanome tanana amin'ity ady amin'ny tsy fandriampahalemana ao amin'ny distrikan'Ankazobe ity, namory ireo olom-panjakana ihany koa ny tenany ho amin'ny Tagnamaron'ny fandriampahalemana. Laharam-pahamehana ho azy ireo indrindra ny fanavotana ny ain'ireo takalonaina, ary indrindra ny

fisamborana ireo dahalo tompontoka amin'izany. Nojeren'ireo delegasiona notarihin'ny Komandin'ny zandarimaria manokana ny alahady teo ny kaominina ambanivohitra Mahavelona, izay isan'ny mitondra faisana amin'ity resaka fakana an-keriny ity. Niresaka mivantana tamin'ireo vahoaka ny tenany no sady nihaino ary nandray ny fitarainana sy fangatahana, mba hialàna amin'ny tsaho miparitaka amin'ny tambazotran-tse-rasera. Niantso fiarahamiantan'ny rehetra ny Jeneraly Rakotondrazaka Andry, hamongorana ny tsy fandriampahalemana. Miain-ga eny ifotony ny loharanom-baovao, ary amin'ny alalan'izany ihany no ahafahana mikaroka ny marina momba ity resaka fakana an-keriny ao Ankazobe sy ny manodidina ity hoy izy ireo.

Niaina

Jobily 30 taona naha-mpanazatra an'i Coach Bay

Hanomboka amin'ny 22 desambra 2023

Hanamarika ny faha-30 taona niseharana ho mpanazatra ny taranja basikety Razafidralambo Bayard na i « Coach Bay », izay feno 60 taona katroka ankehitriny, rehefa nanomboka nisehatra an'izany asa izany tamin'ny taona 1994. Efa nahitana ny dindon-tanany avokoa ny tao amin'ny ekipan'ny SOE « Stade Olympique de l'Emyrne », Dream Team Sc, Challenger (Antananarivo), JEA Antsirabe, Méga Informatique (Toamasina), GNBC (Antananarivo), Ascute (Toamasina), Iscam, Ucm et Inscac, MMBC, CBBT et DGI Tanà ... ary ny Ankoay U18 vehivavy tamin'ny Afrobasket 2022 tany Antsirabe. Marihana fa saika efa nandalovany avokoa ireo dingana rehetra ao anatin'ny tontolon'ny basikety Malgasy, tao anatin'izay 45 taona izay



Coach Bayard am-perinasa.

(mpilalao, mpanazatra, mpampiofana, mpanetsiketsika, mpanolotsaina rafitra mpitantana basikety, filoha seksiona). Ny hetsika amin'ny fanatanterahana hetsika « Feu de Camp » (Barbecue Party) hatao eny amin'ny « Centre culturel et spirituel Antananandriana Ambohimambola » hiarahana

amin'ny artista maro, sy ireo mpanao gazety arapanatanjahantena hanomboka amin'ny 4 ora amin'ny zoma 22 desambra 2023, no hanombohana an'izany fanamarihana ny jobily izany, handalo amin'ny « Gala évangélique », ho fisararana sy fankalazana an'Andriamanitra, hiara-

hana amin'ny Bay & Co, Chorale Ambanidia, Chorale Odam (Mahamasina) ary ny Chorale Fpvm (Ambohitrimanjaka) etsy amin'ny « Salle d'œuvre » ny Ekar St Joseph Mahamasina amin'ny zoma 29 desambra hanomboka amin'ny 11ora atoandro sy amin'ny fanatanterahana lalao basikety ho tanterahina ao amin'ny kianja mitafon'i Mahamasina amin'ny sabotsy 02 ka hatramin'ny talata 05 febroary 2024. Hitohy amin'ny fanatanterahana lamesa lehibe hatao amin'ny Ekar St Joseph Mahamasina ny marainan'ny sabotsy 10 febroary 2024 ary ho faranana amin'ny « Déjeuner dansant » hafanain'ny Orchestre Bay & Co Music aorianan'izany hanomboka amin'ny 12 ora antoandro.

Rainilita

Yandy By Pass

Nikorana ny tontolon'ny volleyball malagasy



Teny amin'ny Yandy By Pass.

Tena nikorana ara-bakiteny tokoa ny tontolon'ny mpankafy taranja volleyball, tamin'ny zoma 8 desambra 2023 teo, teny amin'ny efitrano filanonanana Yandy By-pass tamin'ilay hetsika « levée de fond » hoenti-mampiroborobo an'ity taranja ity, nokarakarain'ny FMVB «Federation Malagasy de Volley-Ball » notarihan'ny filohany, Raharimalala Léa, sy ireo mpiara-miasa aminy, ka azo ambara fa ny masoandro maty no nampalahelo. Tena nafana tanteraka ny fisarahana (fiaraha-nisakafy sy fiarahana nandihy) ary ny fikorianana tombola no natao tamin'izany, ka afa-po ny rehetra raha ny tatitra azo no tenenina. Nisy ihany koa ny fifanakalozan-kevitra samihafa natao nandritra an'ity lanonana ity, mba hitana izay hevitra hampiroboroboana an'ity taranja ity.

Rainilita

Kolontsaina

Fantaro ny dihy « Kadrila malagasy »

Ny kadrila dia fanononana malagasy ny teny vahiny hoe « Quadrille ». Dihy fanao tao androva rehefa misy lanonan-dehibe tamin'ny andro faha Mpanjaka. Dihin'olon-droa lahy sy vavy manao andiany efatra farahafahakeliny ny « kadrila malagasy ». Manana ny hira natokana ho azy ny « kadrila malagasy », izay gadona tena malagasy ary arahin'ny tsinjaka sy ny famindra miaraka aminy. Ankoatry ny ravaky ny dihy malagasy toy ny lantsitanana, ny tsipisandry, ny dihy soroka ary ny doladola sy ny angola dia manao kisarisary ireo andiany. Mety ahitana endrika farimbona mifariabolana, mitanjazotra na mikilafiny na koa mifanatrika. Mifampiarahaba sy mifampitsaoka. Ny fitafy sy ny fianjaikana dia maneho haja sy voninahitra. Ny lamba ho an'ny rehetra miampy ny taovolo ho an'ny vehivavy. Mandritry ny seho dia misy ny hira fidirana anehoan'ny mpandihy ny haingo sy ny endrika amam-bika. Misy koa ny hira fivoahana anatin'ny haravoana sy ny hafaliampo, fanehoana fanajana sy fisaorana ihany koa. Tany ampiandohanana dia soradihy karazany 5 hatrany no aseho amin'ny kadrila miampy ny hira fidirana sy fivoahana. Taty aoriana dia afaka nodihizina tsirairay ny kadrila. Miovaova ihany koa araka ny velaran'ny efitra, ny fotoana voatokana ho azy sy ny isan'ireo mpandihy, araka izay fanirian'ny mpikarakara ny lanonana. Marihana fa efa misy ny tarika « Kadrila malagasy » izay tarihan'ny filohany Mitantsoa Jocelyn. Rodolphe Razafindramboa no filoham-boninahitra. Tanjona ho azy ireo ny hampahafantatra sy ny hanaparitaka ny dihy « Kadrila malagasy » ho an'ireo taranaka mifandimby. Misy rahateo ny fampianarana ny « Kadrila malagasy » etsy amin'ny LMA Ampefiloha, isaky ny sabotsy maraina. Manao antso avo ho an'ny minisitera mpiahy ny kolontsaina, araka izany, mba handray anjara mavitrika amin'ny fanampiana ny sehatrasa tahaka izao ahafahana mitahiry hatrany ny soatoavina raiketin'ireo kolontsaina toy ny dihy « kadrila malagasy ». Fitaizam-batana, saina ary fanahy feno tokoa mantsy ny dihy tahaka ny « Kadrila malagasy » koa mendrika sy rariny raha omena tolo-tanana toy ireo sehatra efa misitraka izany.

Lalasoa Razafindrakoto



Dihy Kadrila Malagasy.

Rugby

Ny SCB sy FTFA ary ny Cosfa sy USCAR no hiatrika ny famaranana

Ny ekipan'ny Scb Besarety sy Ffta Antohomadinika vehivavy ary ny Cofa Miaramila sy Uskar Commune lehilahy, no hiatrika ny lalao famaranana amin'ny fiadiana ny amboara «Coupe de Madagascar de rugby 2023». Ny Scb Besarety dia nandavo mora foana ny Rcts Soavinandrina tamin'ny 45 – 19, teo amin'ny lalao ankatoky ny famaranana notontosaina tetsy amin'ny kianja Makis Andohatopenaka tamin'ny alahady 10 desambra 2023 teo ary ny Ffta Antohomadinika kosa nanilika ny Ftm Manjakaray vehivavy tamin'ny 24 – 22. Teo amin'ny sokajy lehilahy tamin'io ankatoky ny famaranana io : ny Uskar Commune nandresy ny Tam Anosibe 25 -22 ary ny Cosfa Miaramila nanilika ny Ftm Manjakaray tamin'ny 22 – 20. Votso-droa, araka izany, ny ekipan'ny Ftm Manjakaray teo amin'ity ankatoky ny famaranana 2023 ity. Afa-bela kosa ny Cosfa Miaramila lehilahy.

Rainilita